



湘軍記

海
2270
4



門以伊8
號2270
卷4

湘軍記卷十

東湖王定安撰

謀蘇篇

中興以來海內稱勁旅者首推湘軍其次淮軍淮軍之興發軔松滬浸淫至於畿輔然其初起由湘軍故營制餉糈皆同將裨間用楚皖人獨用西洋火器與湘軍異湘軍亦往往仿倣之曾國藩既定江南尤主用淮軍其平粵寇平捻匪常爲湘軍助

朝廷選擢將帥多於湖南安徽求之至於防海禦夷改用

泰西陣法鳴角出令皆夷語則湘軍所無要之樸誠敢戰以效命疆場爲榮退縮畏死爲羞募則來遣則去則湘淮軍無二致也咸豐十年閏三月和春師潰金陵張國樑戰死丹陽和春旋以傷病殂兩江總督何桂清防常州聞警走蘇州巡撫徐有壬閉城不納乃奔常熟四月戊辰常州陷蘇州守兵三千餘皆脆弱不任戰有壬以張玉良新援杭州有功移檄請救玉良引兵守高橋賊間道出九龍山拊高橋背玉良帥大挫率敗卒走杭州賊趨蘇州眾號數十萬城中驚亂丁丑蘇州陷巡撫徐有壬署按察使糧道

朱鈞死之布政使薛煥駐上海署布政使蔡映斗暨守令皆逃

詔逮治何桂清等以曾國藩爲兩江總督薛煥爲江蘇巡撫兼權總督時僞忠王李秀成主蘇州蘇常旣陷松江太倉各城皆淪於賊所存浦東三縣二廳將軍巴棟阿提督馮子材守鎮江巡撫以下皆駐上海上海者通商五口之一西人建樓設市環貨山積蘇浙紳民避難者恃西洋火器多徙居之蘇松太道吳煦負能吏名權布政使糧餉軍械皆倚以辦月獲江海關稅銀三十萬兩關道素習英法

諸酋乃以重金募印度兵用美利堅人華爾領之已而印度兵罷募華人練洋鎗號曰常勝軍常勝軍初止千人後增至四千五百其教練皆西人勇丁食糧視官軍且倍轉戰吳越間所向輒捷中夏之用西人練軍自吳煦始是時巡撫部兵尙數萬然冗散不可任侍郎龐鍾澂倡民團守常熟其他江陰太倉鄉民亦間出逐賊松江嘉定旣失而復克然皆以無援而陷楚軍圍安慶曾國藩進駐祁門論者以安慶垂克宜舉建瓴師攻東壩賊必回顧金陵卽以援蘇之兵夾擊則蘇州可復龐鍾澂亦奏催國藩南下

朝廷慮薛煥兵力單令國藩促左宗棠等軍由皖南進規蘇常國藩奏言臣部李元度張運蘭回湘募勇鮑超因傷還蜀左宗棠新軍未到目下皖南危乎其危浙江亦防不勝防臣軍到齊須一攻廣德一攻甯郡勢不能繞越皖境而逕趨蘇常前准薛煥咨函松江上海等處水陸人數無多欲由張玉良分撥三千人近因江西多事文報阻滯張玉良嘉興一軍與臣信息罕通臣新膺督師江南之命本有統轄該軍之責惟現值皖南阽危不能舍近圖遠荊州將軍都興阿奉

命督辦揚州軍務官文胡林翼百計經營謀所以資送之法而三千勁旅五月口糧難以撥付以臣愚見淮徐風氣剛勁不患無可招之勇但患無訓練之人已函商官文都興阿等酌帶楚師千人馳往江北用楚軍之營制練淮徐之勇丁嚴其禁約寬其期限若得一二名將出乎其間則兩淮之勁旅不減三楚之聲威其後李鴻章創立淮軍果如國藩所策七月賊大舉圍上海薛煥吳煦會洋兵擊卻之八月甯國徽州陷楚師方戰皖南李秀成出羊棧嶺攻祁門與鮑超張運蘭左宗棠相持數月十月上海軍敗賊

金山寶山境十一月蘇州賊犯寶山守將姜德等拒卻之十二月李秀成入江西蘇州賊事僞護王陳坤書僞納王郅雲官主之

十一年二月青浦賊掠廣福林參將李恆嵩會曾秉忠水師卻之自常熟昭文以團練禦賊諸邑紳民皆修備自衛賊亦稍稍畏之青浦練紳何長治沈維城等與賊搏戰屢捷追之至嘉定沈維城戰死於是黃渡安亭香花橋所設賊局悉爲民毀俘其僞官誅之四月上海軍會秉忠敗賊嘉興之西塘青浦賊襲北簞山營李恆嵩設伏卻之五月

嘉興賊窺金山副將黃金友戰歿於廣陳賊掠明珠菴曾秉忠水師卻之蘇州賊援青浦李恒嵩移簞山鳳凰山營退屯塘橋嘉定賊陷大場華漕諸營進逼上海參將梁勝章然巨礮拒走之八月曾國荃克安慶九月楚師循江北城鎮下之耀兵無爲羣賊股栗湖北鹽道顧文彬自武昌還上海因倡乞師之議巡撫薛煥團練大臣龐鍾潞從其策吳煦任餉事備銀二十萬兩僱外國輪船入長江濟師遣主事錢鼎銘知縣厲學湖訓導張瑛如安慶謁曾國藩涕泣乞援大學士翁心存奏蘇常紳民結團自保盼曾國

藩如慈父母請飭揀知兵大員赴通泰道江陰常熟以規蘇州

詔國藩速遣大將慰民望國藩乃薦福建延建邵遺缺道李鴻章堪疆寄令與總兵黃翼升統水陸軍東征十一月李秀成合李世賢陷杭州於是奉賢南匯川沙復失上海知縣劉郇膏往援敗歸滬上震恐論者以夷兵火器精倡設會防局官紳議僉同刑部郎中潘曾瑋航海入都謁議政王白其事奏允行之

同治元年正月僞守王方海宗攻鎮江馮子材戰不利總

兵富陞中礮殞都興阿自揚州撥援不勝

朝旨催李鴻章援鎮江又以薛煥告急李秀成悉眾東趨垂涎松滬促曾國荃率勝兵八千援上海曾國藩奏言今蘇浙賊數太多佔地太廣須俟都興阿一軍肅清江北後路無牽制之虞然後會合上下游分路規取南岸方不至凌躐無序曾國荃新募到須進攻巢縣和州通下游鎮揚各軍之氣仍回上游無巢一面之防未便遠赴上海顧此失彼至上海餉源所出關係亦重惟有聯絡洋人協力守禦江浙賊勢浩大盡占富庶之區廣收官軍之降卒財

力五倍人數十倍若非慎以圖之不特蘇浙難克卽皖南江西且有疆土日蹙之虞過求速效以至僨事轉非所以

仰慰

慈厘

穆宗允之奉賢賊犯吳淞口趨上海法國輪船發礮擊之賊退踞天馬山陳坊橋李恆嵩攻破其壘賊走青浦而浦東大股踞高橋扼我要害華爾約英吉利法郎西兵列陣海濱而自率美利堅人白齊文戰高橋盡平賊壘上海解嚴華爾白齊文願改服色隸中國

沈軍言 卷一 六
詔獎四品頂戴花翎二月華爾攻蕭塘克之三月庚寅李
鴻章率陸師五千五百人發安慶壬辰至上海營城南
詔鴻章署江蘇巡撫從曾國藩請也鴻章初隨侍郎呂賢
基在皖團練頗被謗議賢基薨隨巡撫福濟營鬱鬱不自
得己乃贊國藩戎幕襄理文牘未領兵也會

朝廷垂詢蘇撫國藩薦鴻章可大用乃令揀湘軍良將程
學啟郭松林等領六營以知府李元華所領皖軍增募淮
勇爲五營劉銘傳潘鼎新張樹聲韓正國滕嗣武等分領
其眾淮軍之興自此始其後銘傳鼎新樹聲皆擢將帥學

啟嗣武至提鎮正國早亡皖人游膺督撫者前後相望其
他提鎮司道不可勝數與湘中將帥分道比隆矣淮軍初
起時所部半楚勇高壘深濠晨夕操練吳人以爲創見滬
中兵勇尙奢靡而楚軍衣幟樸陋外國人或譏笑之將弁
頗慚鴻章曰軍貴能戰待吾破賊習之是時揚州急

朝旨促鴻章布置滬防卽往鎮江與都興阿會師鴻章以
兵數單不能分援各路請期歲時資訓練華爾李恆嵩會
英法二國兵復嘉定青浦留西兵與常勝軍守之英提督
何伯請鴻章會攻浦東廳縣鴻章乃以程學啟劉銘傳潘

海軍言 卷一 七
鼎新郭松林將湘淮人攻南滙號北路軍而英法兵自松江進金山衛號南路軍辛未常勝軍會英法兵克奉賢法提督卜羅德中鎗殞

詔賞貂皮綵緞卹其家壬申克柘林偽忠王李秀成在蘇州聞嘉青皆克自將援太倉知府李慶琛方攻太倉兵敗死之賊悉銳攻青浦嘉定英法提督慌賊眾遣隊突圍護其軍出嘉定並強挾各官以走嘉定復陷英法兵還上海不復出賊益趨青浦松江攻泗濱守軍皆潰遂分趨虹橋漕河涇距上海二十里五月甲申鴻章急檄程學啟等由

浦東還扼虹橋丁亥學啟敗賊漕河涇戊子擊破泗濱援賊進營新橋涇劉銘傳潘鼎新復南滙川沙浦東漸定賊圍松江急華爾李恆嵩分門要擊賊頗創而青浦被困華爾議棄之甲午夜簡常勝軍之銳者猝破天馬山由礮路突入青浦悉焚米糧軍船死戰出城併力守松江壬寅偽聽王陳炳文偽納王郜雲官率數萬眾犯新橋圍程學啟營數十重填濠拔鹿角學啟以鎗礮禦之不及則擲甌石擊賊尸平濠將藉以登學啟然劈山礮開壁突擊賊乃卻而賊之分股已踰新橋十餘里勢且逼上海鴻章自將七

營往援。遇賊徐家滙。張遇春奮力擊走。追之至新橋。學啟望見旗幟大呼出壁。賊駭奔。外國軍見其戰。自以爲不如。自此上海湘淮軍始振。中外人無復敢擲揄者矣。是月。曾國荃進兵雨花台。

詔仍命李鴻章赴鎮江。助攻金陵。鴻章奏臣接曾國藩書。頗以進攻金陵兵單爲虞。曾國荃亦言官軍止能圍西南兩面。深溝高壘。以水師爲根本。以江面爲糧路。先自固以圖賊。非增二萬人不能合圍。臣查金陵城大而堅。和春張國樑統師八九萬。圍攻日久。功敗垂成。今蘇浙徧地賊區。

處處可進援。尤與昔年情形迥異。所恃楚軍穩慎。較勝他軍。曾國荃軍數不及二萬。不足合圍。卽未能制賊死命。此次李秀成撲犯松滬。負創而遁。聞將連合杭湖賊眾。救援金陵。臣急欲馳往鎮江。就近援助。無如原部陸軍僅數千人。分兩處則均不得力。專一處則尙可自立。軍事重大。臣何敢易言之也。滬中官民向恃洋人爲安危。乃援賊未來之先。洋人分兵四出。援賊大至之後。洋人斂兵不動。臣揆度夷情。似非暗與賊通。坐觀成敗。實係懾於賊眾。不敢向前。是知洋人不可專恃。滬防必須自強。臣忝任蘇撫。旣不

能棄滬中餉源之地。又不敢緩鎮江接應之師。曾國藩處似亦無統兵大員可派來滬。容臣將滬事辦妥。移師出江。詔緩鎮江之行。六月。潘鼎新劉銘傳復金山衛。賊遁浙江。松滬解嚴。黃翼升淮揚水師踰九洲浮海至上海。詔翼升署江南提督。前提督曾秉忠所部艇船廣勇分防浦東西。多剽斂不法。秉忠以是奪官。翼升師船穿賊壘。多被礮傷。鴻章乃令曾秉忠嚴束所部。扼要隘。俟翼升師船修補。乃換防。且奏論紅單船不可用。請裁撤。七月乙未。程學啟克青浦。留軍與淮揚水師守之。常勝軍浮海克餘姚。

辛丑。偽慕王譚紹洸犯青浦西門。黃翼升水師敗之。丙午。犯北簞山。滕嗣武韓正國乘賊填橋出擊。水師乘之。賊乃長驅攻北新涇。守將況文榜相持七晝夜。賊分股掠法華鎮。西距上海十餘里。八月辛亥朔。水師將王東華乘潮毀賊浮橋。賊屯南岸。彌望二十里。旦夕犯上海。人心恟懼。鴻章部將惟張遇春軍三千在滬。然皆分防百里內。乃飛檄劉銘傳由金山衛。華爾由松江。倍道來援。約程學啟青浦諸軍。以其半留守。而率半隊急趨泗涇。七寶出賊後。咸聽學啟指。鴻章自將上海兵。約期與學啟會擊北新涇。壬

子漏將盡學啟間道裹糧至七寶譚紹洸率三萬眾圍學啟營往來馳突銳甚學啟閉壁伺其懈發礮擊之傷賊甚夥韓正國裹創搏賊滕嗣武郭松林周盛波張樹珊張桂芳等咸奮力苦戰學啟往來督之賊大潰譚紹洸走野雞墩癸丑李鴻章與學啟會師北新涇滕嗣武郭松林已入況文榜營軍中見援軍幟咸譴呼出壁攻破賊壘十餘賊走吳淞江北阻大河列陣黃翼升水師自青浦乘潮入與敗賊相持夜大風雨發礮如雷斃賊數百毀其北岸營七賊始卻甲寅劉銘傳敗賊野雞墩徐家滙乙卯追之至南

翔賊遁入嘉定滬防復靖丙子淮揚水師華元龍敗賊澱山湖丁丑華爾克浙江慈谿創甚死之以白齊文領常勝軍華爾美國鈕要人咸豐十年應吳煦募積功至副將嘗以五百人破賊十餘萬於松江之迎喜濱天馬山最爲奇捷及死從其志以中國章服斂葬松江閏八月李秀成自蘇州援金陵楚軍患疫上海軍亦多病李鴻章增募淮勇五千曾國藩檄李朝斌倡興太湖水師赴松滬會剿九月英提督何伯恥前此嘉定之失以將受代歸詣李鴻章約攻嘉定鴻章遣李恆嵩白齊文率常勝軍千五百人礪勇

千人與之偕。何伯自領英法兵二千五百人進攻。辛亥。西兵築礮台。然炸礮。日將午。南城傾。賊開西門奪路走。遂克嘉定。敗太倉援賊。以況文榜駐之。譚紹洸等復糾蘇州嘉興賊十餘萬。自崑山太倉趨松滬。丙辰。犯四江口。圍劉士奇鄭國魁營。遂犯黃渡。盡築卡於橋梁以阻師。程學啟時屯黃渡。令周盛波郭松林等分左右迎擊。截賊爲二。追之安亭。鴻章以四江口被圍久。自將至黃渡督戰。時譚紹洸部眾屯吳淞江北。陳炳文鄧光明踞南岸。辛未。鴻章令劉銘傳當中路。程學啟當右路。郭松林當左路。自辰至未。戰

不克。松林銘傳皆偪賊壘。拔籤逾濠。伏而前。斬黃衣酋數人。賊少動。乃冒煙入。毀其壘。二右路賊趨救。學啟已受礮子傷。見賊旂掣退。裒創疾前。與陳飛熊等以二千人然洋鎗。賊由南岸潰而北。我軍三路掩殺。四江口圍始解。賊走崑山。常勝軍亦破賊白鶴江。黃翼升水師要擊。潰賊追之。三江口。循途燬其浮橋石卡。殆盡。滬防三次解嚴。賊自是不復窺松滬。

詔真除李鴻章江蘇巡撫。方曾國荃之被圍金陵也。鴻章疏請多隆阿南援。而以陝事責勝保。然其勢已不及。曾國

藩檄召程學啟方戰黃渡不能應乃議令吳煦率白齊文常勝軍往十月曾國荃擊退蘇浙援賊馳書止常勝軍然已疏報不可止乃議移攻九洲吳煦至鎮江待白齊文不至還上海白齊文方閉松江城索餉毆道員楊坊於上海攫取餉銀四萬兩上海軍事諸國皆受英國指李鴻章乃延英提督士廸佛立領事麥華陀告之故解白齊文兵柄捕治之奏劾吳煦楊坊褫其職責償所費十餘萬兩以常勝軍故創於二人也白齊文既獲弗加誅勒令歸國以李恆嵩奧倫領其眾未幾鴻章與英提督議約以戈登易

奧倫仍令恆嵩同領之裁減冗費留三千人仍號常勝軍乙巳黃翼升督水師規蘇州擊賊於蘆墟尤家莊汾湖三官塘盡破其卡丙午回軍洪家灘至嘉善之窰街丁未抵夏湖西塘援賊大至副將蔡東祥都司曹相王歿於陳十一月常熟賊錢桂仁駱國忠太倉賊錢壽仁款於游擊周興隆李鶴章約期內應適李秀成新自金陵還蘇州錢桂仁內懼託往謁覘之駱國忠恐誘桂仁黨盡誅之舉城降興隆收復常熟國忠復令其下至福山招降福山賊已固守十二月戊寅朔駱國忠攻福山濞浦白茆徐六涇諸海

口同日下之。李鶴章程學啟攻太倉。阻風雪弗能進。錢壽仁知事洩。率二千人出太倉。詣上海歸誠。復姓名曰周壽昌。而蘇州內應事復洩。李秀成召無錫江陰六七萬眾爭常熟。官軍分守嘉定青浦。不能應。鴻章乃檄福山鎮鞠耀。乾泊福山。徐六涇爲常熟聲援。而囑周興隆駱國忠堅守。鞠耀乾師船初與賊持。已而爲颶風所擊。移北岸。福山復陷。鴻章復約黃翼升統水師三營出海。赴之。而令陸師分攻崑太。戊戌。程學啟進崑山之蟠龍鎮。擊賊敗之。壬寅。奧倫李恆嵩率常勝軍攻太倉。李鶴章郭松林會之。甲辰。然

炸礮破賊壘。渡河據之。乙巳。復以炸礮擊太倉城。城裂數丈。常勝軍先登。賊洋鎗落如雨。浮橋猝斷。軍亂爲所乘。常勝軍死數百人。郭松林禦之以退師。軍氣大阻。次日奧倫遽挾其軍還松江。而淮揚水師赴福山者。亦以颶風損船。黃翼升屢覆於水。乃移旋避風。常熟援守益孤矣。

二年正月。李鴻章以常熟急。檄劉銘傳等領三千人乘輪船赴福山。與黃翼升會師。復令常勝軍往助。二月甲午。戈登然炸礮。呂宋兵乘小舟薄賊壘。駕浮橋。伏死士於城牆下。日中。港東西賊壘皆破。遂奪福山石城。周興隆登城。見

賊入西山而福山火起。知援軍已破賊，乃開四門出戰。福山水陸軍亦至，賊大奔。常熟圍九十餘日，至是始解。嚴、李秀成由江浦新河口再犯江北，西掠至六安，皖北大擾。李鶴章程學啟方攻太倉，僞會王蔡元隆乞降，許之。三月乙卯，鶴章學啟嚴陣以待，鶴章渡河將入城，賊忽裹白巾出東南門來犯，軍急退，亡數百人。鶴章傷足，幾及於難。學啟方扼西門，猝見賊舟數十自崑山來，與城賊語甚暱，疑而防之。賊千人果出戰，學啟奮擊卻之。李鴻章聞警，令劉秉璋馳救鶴章，而調常勝軍會攻太倉。戊午，學啟會水師歐

陽利見偏西門，常勝軍毀南門賊卡。庚申，戈登以大礮列學啟營前，毀石壘二。辛酉，益發炸礮攻城，日將晡，城裂，賊走南門不得出，斬捕幾盡。遂克太倉。學啟偕戈登進崑山，攻兩日不下，戈登領常勝軍暫歸松江。學啟屯崑山東門，令劉士奇屯北門，周良才扼周市。四月甲申，周良才敗賊周市。丁亥，學啟令周良才襲賊後，劉士奇分左右翼進。學啟自督親兵繼之。適戈登至自松江，以炸礮助攻，竟日破賊壘二十四，殺賊近萬。戈登銳意攻城，學啟謀曰：崑山三面阻水，陸路達蘇州，必道正義，我奪而據之，絕其援而斷

其歸路破之必矣。己丑，學啟約郭松林等水陸攻正義，戈登繼至，殺賊三千，以陳有昇等守之。譚紹洸率四萬眾來爭，學啟令郭松林等會水師扼隘口，周良才等屯北門橋，何安泰等扼東門，而自將當正義大道。日已暮，紹洸悉悍黨出小西門，中伏，還走入城。學啟合諸軍攻益力，庚寅克崑山。譚紹洸由陽澄湖遁。時劉銘傳屯鹿苑，規取楊舍、楊舍隸江陰，居蘇常之交，故有城，賊踞之以蔽江陰，無錫者也。甲午，黃翼升水師由夏橋港破江陰賊。乙未，劉銘傳偪陽舍而軍。劉盛藻營東北隅，戊戌，然炸礮，壞城數丈。劉盛

藻揮軍設雲梯，賊以洋鎗抵城缺，軍士頗傷亡。銘傳趣隊益急，盛藻負板以登，楊舍復，城賊無逸者。自崑山之克，程學啟益規畫取蘇州。五月，由唯亭用直移駐外跨塘，距蘇州日益近。李鴻章奏言：今常熟解圍，太崑迭克，蘇嘉之賊猶圖死抗，蓋嶮足自固，而利不肯棄。李秀成爲諸賊之冠，據有蘇杭嘉湖四郡之地，最多狡謀。咸豐十年，圖解金陵長圍，則攻浙江以取遠勢；十一年，圖救安慶，則攻江西湖北以取遠勢；去年迄今，復救金陵，則分竄皖南北，又欲竄揚州，裏下河以取遠勢。今我軍進偪蘇州，仍徘徊金陵上

下不卽回顧。我果攻急，或挈眾來援，或別圖竄踞，均在意中。臣軍水陸已踰四萬，曾國藩又令總兵李朝斌率太湖水師十營，尅日下駛。今擬酌分三路以勦爲堵，由崑山進蘇州爲一路，程學啟陸軍當之，由常熟進江陰，無錫爲一路，李鶴章、劉銘傳陸軍當之，黃翼升督淮揚水師相輔並進，戈登常勝軍移駐崑山，專備各路援應，泖澱湖達吳江、平望、太湖爲一路，則李朝斌水師當之。又恐杭嘉湖賊繞竄浦東，窺撲松滬，復令常鎮道潘鼎新八營扼金山衛，編修劉秉璋七營扼洙涇，副將楊鼎勳五營扼張堰，聯爲一

氣以防內竄。

穆宗嘉之。時李秀成在江北，聞湘淮軍且圍蘇州，乃渡江至無錫，率五僞王眾號數十萬，連營六十里，聲言援江陰，攻常熟。李鶴章令劉銘傳攻其左，郭松林等攻其右，滕嗣武等當中路，黃翼升水師助之。鶴章率馬隊登顧山吹角，趣諸軍戰兩日，銘傳軍破賊壘二十七，松林等軍破賊壘二十五，嗣武等軍破賊壘二十三。顧山以西賊皆盡。六月，僞護王陳坤書大舉犯楊舍，劉銘傳屢擊破之。程學啟進攻夾浦，蘇州賊自寶帶橋來援，敗之。遂克寶帶橋，復敗賊

於九里湖。克同里鎮。戈登李恆嵩乘間趨吳江。賊酋舉城降。學啟遂復吳江。戈登以常勝軍歸崑山。適白齊文投賊。率外國流氓二百入蘇州。流氓猶言無賴也。李鴻章令戈登嚴備之。而移檄各國領事禁洋人濟賊。嘉興賊犯吳江。程學啟擊走之。賊入平望。學啟留將分守吳江夾浦。自歸唯亭。賊攜外國流氓犯夾浦。發小炸礮擾我軍。學啟軍擊卻之。七月。李朝斌率太湖水師至上海。李鴻章與朝斌出巡。溯吳淞而西。以太湖通蘇浙。賊船如織。令學啟與朝斌會師夾浦。朝斌督師船百艘。攻沿湖賊卡。下之。賊距東洞。

庭山九里。築兩壘。通蘇嘉往來。學啟分水陸攻三日。兩壘皆克。學啟乃還軍偪葑門婁門。而令太湖水師泊南舍鎮。以圖蘇州。鴻章益促劉銘傳等攻江陰。劉秉璋等徇嘉善。以分賊勢。銘傳圍江陰急。陳坤書自常州來援。銘傳令周盛傳禦之。而賊來益盛。李鶴章率洋鎗隊至自常熟。與賊久持。頗傷亡。增召張樹珊等出常熟福山。郭松林等出祝塘周莊。黃翼升水師駐江干。銘傳屢以炸礮燬賊壘。八月乙亥朔。城賊內應。遂克江陰。劉秉璋潘鼎新亦克嘉善之楓涇西塘。李鴻章親視婁門。程學啟營。遣張樹聲等援蕩。

口破賊謝家橋追之至齊門復敗賊黃埭學啟進屯永安橋賊開婁門葑門齊門分道來犯外國流氓昇炸礮助之學啟三路禦賊外國炸礮多不裂賊驚爲神收入蘇州學啟遂偪城而軍於是婁門賊道始絕譚紹洸黃子澂率七僞王攻學啟不勝李秀成新自金陵引軍至學啟方攻寶帶橋戈登與法將龐發乘輪船會師克其石壘追之至盤門秀成親率悍賊來戰學啟奮臂大呼軍士忍飢還擊日已暮賊乃卻范遇春等陣歿龔生陽鄭國榜皆受創以戈登龐發屯寶帶橋學啟與李朝斌水陸扼要隘於是葑門

道亦絕初白齊文匿上海掠我所租輪船二獻賊李秀成乘之由齊門至西白蕩漕莊口譚紹洸出葑門來襲水師要擊輪船不得出湖紹洸退秀成始改道由虎邱望亭犯大橋角白齊文輪船助之發西洋所號三十二磅炸礮者墮我軍所觸皆糜死者枕籍周壽昌率死士持連珠噴筒膝行伏河干擊之燒其輪船一延及長龍礮艇洋人及船賊殲焉賊舟大亂李鶴章援軍適至賊奔后宅復爲黃翼升水師所敗李秀成痛哭去九月秀成復糾賊八九萬據后宅令諸僞王由望亭后宅屯營互進李鶴章攻之不克

賊益召諸巨酋集西路。冀保無錫以援蘇州。程學啟戈登方攻蘇州五龍橋。五龍橋在寶帶橋西五里。賊由澹臺湖鮎魚口達太湖以通浙江者也。學啟自率水陸四千人由寶帶橋戈登輪船由鮎魚口攻其左右。李朝斌水師進澹臺湖破賊壘六。譚紹洸出盤門來援。張遇春敗之。紹洸約嘉湖賊至同里犯平望。爲蘇賊聲援。學啟屬戈登守五龍橋。自領水陸三路趨平望。會軍八坼大破之。僞會王榮王僅以身免。令陳有昇等駐五龍橋。於是盤門出太湖之道亦絕。時李秀成踞后宅西倉麻塘橋。李世賢則北踞惠山。

高橋南及坊前梅村列隊數十里。犯緱山。李鶴章令周盛波劉銘傳攻坊前。張樹聲郭松林攻梅村麻塘。自領洋鎗隊援應。三路皆大捷。而秀成麻塘石營終不克。松林傷乃返。十月李鶴章益促諸將番進。偪東亭攻李世賢。劉銘傳毀其營牆數丈。劉盛藻率親兵越入。賊火鎗如雨。仍不克。而蘇州軍已奪許墅關。賊聞皆驚。許墅在蘇州西。僞來王陸順得守之。程學啟戈登越蘇州進攻黃翼升水師會之。戈登已破王瓜涇賊壘六。學啟破觀音廟賊壘四。遂會攻許墅。克之。進毀十里亭賊壘。虎邱楓橋賊皆遁。躡之至閶。

門戶骸填道自太湖水師到防黃翼升水師當赴淮揚會
國藩以苗沛霖反淮上檄翼升援臨淮而提督楊岳斌侍
郎彭玉麐均以水師替防益促翼升西上李鴻章奏翼升
攻蘇州無錫方亟李朝斌僅能顧蘇州以南俟蘇錫克乃
遣翼升

旨加議鴻章以程學啟攻蘇州久不下親赴婁門督師賊
自盤門迤北東至婁門連營數十皆附牆穴地覆板累土
其上以避炸礮而婁門外石壘長城尤堅屹不可拔鴻章
度賊眾雖盛外援漸絕益促學啟戈登攻城己丑夜軍士

閭設浮橋銜枚疾進戰已達其壘矣賊伏斷橋下以洋鎗
狙擊常勝軍多傷亡不能進李秀成方間道入城助譚紹
洸爲守壬辰我軍盡出炸礮二十餘轟其壘學啟緣南岸
戈登緣北岸鴻章親督之日過午牆頗傾秀成紹洸率萬
人出婁門拒戰學啟麾軍大進常勝軍肉薄先登長城石
壘皆破秀成紹洸還走入城當是時水師將陳東友自黃
天蕩登陸擊賊婁葑兩門克賊壘二十餘黃翼升況文榜
擊賊齊門破之李朝斌張遇春亦破盤門六壘我軍三面
薄城賊益洶懼譚紹洸夙凶忍猶率悍黨死守而郅雲官

湘軍記 卷十一 三
等有貳心密款於副將鄭國魁學啟戈登單舸見雲官等
於城北洋澄湖備得其要領命斬秀成紹洸以獻而給雲
官等二品武職學啟與爲誓戈登證之雲官益不疑而不
忍殺秀成許圖紹洸甲午秀成微覺之顧事已無可爲涕
泣握紹洸手爲別乘夜出胥門由雲巖木瀆以逸官軍攻
益急丁酉紹洸以事召雲官攜僞天將汪有爲往卽坐刺
殺紹洸並殺其黨千餘人開齊門迎降學啟令鄭國魁領
千人入城戊戌獻紹洸首請驗學啟入城撫視降酋列名
者八人精壯猶踰十萬羣酋方歆血誓生死乞學啟白鴻

章要總兵副將官署其眾爲二十營仍屯閭胥盤齊四門
雲官且未薙髮學啟密白鴻章恐不可制必誅之以定眾
鴻章猶豫不忍發而徇學啟請弗能阻己亥僞納王郜雲
官比王伍貴文康王汪安均甯王周文佳僞天將范起發
張大洲汪瓌武汪有爲出城謁鴻章鴻章先備二品冠服
待之甫參謁鴻章遽入帳學啟先已置人帳後伏起悉斬
之學啟入城諭眾誅拒命者二千餘人餘皆聽命遂克蘇
州庚子鴻章整部入城而副將鄭國魁故與郜雲官誓不
相殺憾學啟負約涕泣不食卧三日鴻章亦頗咎學啟輕

發曰君亦降人也何爲已甚學啟大怒還營將引軍去其營弁奔告鴻章鴻章復過學啟陽論他事笑語甚歡事乃解鄭國魁終以誑殺雲官怨不已洋將戈登夙暱學啟至是以殺降詈之揚言挾其軍且爲變覓雲官首攜之哭並索得其養子送崑山鴻章乃令國魁爲雲官設佛事七日親詣祭弔國魁叩棺大哭呼曰殺汝者自有人吾不汝詐也鴻章泣數行下眾乃輯服李秀成之棄蘇州西遁也乘小輪船毀無錫西門橋以出繞至萬壽橋令賊乘霧圍我營其輪船發炸礮衝高橋水師劉銘傳率百人伏河埂以

洋鎗斃外國舵師賊乃匿駛輪而去圍營之賊亦走劉銘傳乘勝進無錫南門周盛波進北門張樹聲進東門黃子澥聞蘇州已殺降率七萬人死守十一月甲辰朔郭松林破惠山亭子橋石卡乙巳張樹聲郭松林周盛波破東南北土壘皆盡望城賊漸移疾逾河昇梯以登周壽昌擒偽潮王黃子澥郭松林擒其子黃德懋並獲偽酋數百駢誅之遂克無錫李鴻章奏言僞忠王李秀成自咸豐十年春閒破金陵長圍壘陷蘇常杭嘉湖上竄江西湖北擄脅潰兵遊匪以百萬計盡得東南財賦之區取精用宏日以強

大自去歲屢戰屢敗及投降各城精銳散亡不下二十萬今年春夏閒竄皖北經上游官軍截殺解散又十數萬其自九洲過江僅存四五萬人維時偽天王驚惶失措猶賴李秀成回金陵主持守局而秀成以蘇州爲分地事急故須回援其部眾布滿蘇浙以踞守蘇州之譚紹洸邵雲官踞守杭州之陳炳文鄧光明踞守無錫之黃子澐爲最悍且眾今秀成巢穴已失黨羽已孤踉蹌西走隨行僅兩萬餘人將赴金陵解圍曾國荃鮑超等兵勢正盛攻剿正緊料其無法解救則挾僞天王洪秀全及其母妻眷屬由

浙皖交界上竄江西福建以尋回粵之路臣駐蘇州徧察賊中城守規畫布置極有條理深以未得擒殺此酋爲憾現曾國藩派兵回防江西左宗棠派兵分截皖南固已豫有戒備但使不再踞城池變爲流賊剿滅較易臣今擬令程學啟李朝斌劉秉璋潘鼎新由平望乍浦兜剿浙西之賊冀與左宗棠蔣益澧之軍前後夾擊李鶴章劉銘傳進常州宜興兜剿蘇境之賊冀與曾國荃鮑超之師前後夾擊欲分各路賊勢藉固蘇滬藩籬惟各軍自春徂冬積勞致病須略加休息以待進取

穆宗嘉允之。辛亥，劉秉璋、潘鼎新攻浙之平湖，賊酋陳殿選降。遂復平湖。於是乍浦、海鹽、澈浦皆反正。丁巳，劉銘傳進攻常州，破東北賊壘數十，收降眾萬六千人。戊午，張樹聲、周盛波襲破東門石壘二，與銘傳軍相應，乃會攻小北門。銘傳額中鎗傷，盛波追賊過西門，破南門石壘。己未，張樹聲傍城東北築四壘以偏賊。庚申，攻小北門土城，克之。是時李秀成攜妻孥乘輪船至溧陽，復由溧陽入奔牛，運河日夜發炸礮擊我營。十二月乙亥，劉銘傳抽隊二千援奔牛，阻賊不得達，乃約郭松林滾營前進。李鶴章令董鳳

高等繼之。李秀成、李世賢、陳坤書益召金壇、溧陽、丹陽、常州賊數萬聚奔牛。鶴章增調三千人與銘傳會軍。丁亥，曹仁美以火蛋焚其輪船，銘傳、松林乘勢大破之，羣賊還走丹陽。

三年正月丙寅，郭松林、戈登克宜興，松林進攻溧陽，擊破李世賢於張渚。世賢退溧陽，守賊吳人杰不納。世賢走湖州。二月壬申朔，吳人杰迎降。癸酉，郭松林復溧陽。甲戌，進軍金壇。乙亥，敗偽劉王襄王於楊巷，追至金壇南門。是時常州賊陳坤書方合丹徒、句容賊十餘萬，繞常州城北築

壘數十日犯我軍。劉傳銘屢擊退之。值陰雨連旬，賊奄至江陰之南閘。辛卯，犯常熟。壬辰，犯福山。所過焚掠。於是江陰無錫、常熟皆警。蘇州以西大震。李鴻章飛檄郭松林棄金壇勿攻，倍道歸援。令李鶴章守無錫，李昭慶、鄭國魁由嘉興、賈宏材由無錫，符信由蘇州助守常熟。賊分趨無錫。李鶴章拒卻之。而江陰賊亦為守將駱國忠所敗。賊遂併趨常熟。黃翼升水師方還江北，乃由白茅口進常熟。與王東華水師會。郭松林破賊於王莊。翼升東華截之。賊首尾不相救，自相蹂。掩殺無算。常熟解圍。賊走福山，陷之。守將

鞠耀乾鐫級。以郭松林為福山鎮總兵。己丑，程學啟克嘉興。學啟之攻嘉興也，偽榮王廖發受乞降。學啟知其詐，攻益力。陣亡勇將何安泰。學啟坐礮台三晝夜，自發田雞礮斃賊無數。偽堵王黃文金自湖州來援，遣張家瑜等擊走之。學啟益發炸礮壞城，促將士先登。死者枕藉。學啟憤，自逾浮橋乘城。左腦中鎗子，昇歸營。潘鼎新、劉秉璋、李朝斌相率入城。學啟養傷。蘇州創已合。一日，獨坐深念，有所忿。創口復裂，竟死。學啟桐城人。先陷賊中，安慶之圍，款於曾貞幹。約內應。未及期，夜率千餘人叩壁門呼曰：「今事發與

賊戰追者卽至公相信者開壁門納我不信急發礮擊我無兩敗也軍中大驚疑貞幹開門納其眾俄而追者果至學啟由是願效死貞幹已乃隨曾國荃國荃尤奇其才破安慶多資其力李鴻章之赴滬也請於曾國藩學啟以東所部號開字營勇略冠軍料敵輒奇中其突圍陷陣見者以爲神兵洋將戈登素敬服學啟比誅降酋久不見聞其死乃泣下以所建二旗歸詫海國鴻章論其功爲吳中第一

詔蘇州嘉興皆建祠庚寅左宗棠克杭州三月李鴻章督

軍圍常州時城西賊營猶二十里環列運河左右乃令劉銘傳破其西北六壘郭松林楊鼎勛攻陳渡橋八壘破之張樹聲周盛波鄭國魁攻河干二十餘壘盡破之於是賊西道皆絕壬戌炸礮壞城數十丈陳坤書以洋鎗隊抵城缺官軍與賊多傷死終不克是時馮子材富明阿由鎮江進丹陽賊壘多降鮑超由句容攻克金壇常州守賊益孤四月李鴻章令軍士傍河築長牆設浮橋期必克顧久雨不霽甲戌禱於關帝之神次日雨稍止乃令劉銘傳攻北門戈登礮隊攻南門郭松林楊鼎勛應之劉士奇王永勝

攻東南隅。張樹聲應之。丙子。天大霽。反風水陸礮聲發。如雷。煙焰撲城頭。舊壞城復傾數十丈。賊以人塞缺口。值炸礮。則甌石旗械紛激起天際。然旋死旋集。終弗退。鴻章益揮軍登城。郭松林王永勝劉士奇接刃戰城頭。久之。賊始潰。偽護王陳坤書偽列王費天將皆就擒。銘傳松林令於城棄械者免。跪而降者數萬人。官軍亦亡千餘。遂克常州。戊寅。馮子材復丹陽。於是蘇常賊悉由徽州入江西。曾國藩檄鮑超西援。而屬鴻章分兵代防。乃以劉銘傳屯句容。鄭國魁屯東壩。周盛波屯溧陽境。馮子材鎮江軍凱撤。以

張樹聲駐守鎮江。撤常勝軍三千人。戈登歸國。留礮隊六百。人以副將羅光榮領之。移駐滄墅。鎗隊三百人。隨總兵李恒嵩駐崑山。六月。曾國荃克金陵。曾國藩大散湘軍。其後挈淮軍北征。遂用以平捻匪。王定安曰。李公鴻章。初以優貢。客京師。卽師事曾公。國藩其後入翰林。出贊呂賢基福濟軍事。崎嶇顛沛。讒謗頗起。福公嘗具疏薦道員。鄭魁士阻之。旣簡延建邵遺缺。擁空名。無官守。遇亦艱矣。曾公督兩江。議興淮揚水師。請補江北司道。未行。復薦兩淮運使。疏至。

文宗北巡不之省。李公亦自以爲數奇，不復言祿矣。未幾穆宗卽位，詢蘇帥曾公復薦李公，遂以道員超擢巡撫。數年之間，南定吳會，北平捻匪，剖符封爵，位兼將相，勛業爛然矣。嗟夫，士之未遇也，固有飯牛版築三北而不羞者矣。及其遭遇聖明，乘時利見，罄其才智，則可以迴乾坤，挽山河。故曰：張之則爲龍，弛之則爲蛇。自古聖賢豪傑，見知於天子，建樹於時者，始未嘗不淹塞。後乃烜赫也。嗚呼！如李公者，可謂無負曾公知人之明者歟。

湘軍記卷十

武昌范德培校字

湘軍記卷十一

東湖王定安撰

謀浙篇

浙江負山跨海，夙號奧區。物產豐饒，亞江蘇而溫處合紹甯古甌越地。民俗健銳，類閩廣。若募練爲兵，足以自保。寇興，湖南北安徽當衝要，賊方以全力戰楚皖。江西閒浙處偏陬，未被寇軍撫狃，故習亦未嘗討論戎事。遙恃江南大營爲屏蔽，歲竭賦稅銀七十萬供軍。及粵人陷上海，月增餉銀四萬，亂定始罷。皖南爲賊孔道，賊陷徽甯，撼浙邊巡

撫輒發兵扼威坪昱嶺千秋關張虛聲爲守寇入則乞援金陵當黃宗漢撫浙時議者欲割皖南爲外捍其後巡撫何桂清奏設皖南鎮如臺灣例皖南道專奏報將弁餉糈歸浙撫節度江南軍倚浙餉遇徽甯警率遣猛將勁兵往援以爲皖南者浙門戶也咸豐五年春賊由祁門犯徽甯福建道員徐榮率浙軍禦之漁亭戰歿徽州休甯婺源歙縣皆陷何桂清遣知府石景芬率浙兵會民團復之向榮已遣江南將鄧紹良周天受援皖南則會浙軍攻婺源休甯逐賊石埭六年三月賊陷甯國府將由廣德建平入浙

總兵秦如虎擊卻之鄧紹良已授浙江提督統萬人圍甯國未幾江南大營陷浙防益岌岌恃紹良遏寇氛不得南逾半載紹良克甯國因駐軍焉自江西大擾廣信屢陷賊往來常山玉山於是衢州防務始重

詔移貴州安義鎮饒廷選鎮衢州七年二月江西賊陷婺源窺浙邊巡撫晏端書遣周天受禦之參將師長鏢戰死八年二月僞翼王石達開自江西廣豐入浙掠江山圍衢州金衢嚴道繆梓率數百人迎擊城下大破之遂與饒廷選登陴數日守具皆辦繆梓部將楊國正瞿先仲皆能戰

民倚賴之。賊西陷常山，開化南陷，遂昌、松陽三月陷。處州與温州一江隔，烽火相望。全浙大震。胡林翼奏以李元度率平江勇援浙。元度由河口進兵，欽差大臣和春增遣江南將明安泰、李定太、周天受助徽防。明安泰所部尤騷擾。由金華入縉雲，至桃花嶺下。民團詐呼賊至，軍大潰。戕斃過半。周天受繼至，士卒亦被傷。自是兵民相仇殺，大局日隳矣。晏端書以客軍不相統，奏令周天受專辦金處。張芾專辦嚴衢。四月，湘軍將李續賓克九江。

詔授浙江布政使。續賓威名甚盛，浙人官京師者，連疏請

續賓履任治軍。官文、胡林翼以皖事急，留而不遣。五月，李

元度敗賊玉山子午口，李定太克壽昌。

文宗慮周天受資淺難統眾。

詔和春督浙江軍，會患病未行，乃起復丁憂侍郎曾國藩由湖南赴江西，率湘軍舊部援浙。六月，國藩發湘鄉。己酉，李元度會江南軍復常山。庚戌，復江山。賊圍衢州三閱月，掘地道五，不成。繆梓饒廷選屢擊破之，食盡而遁。衢州解嚴。周天受遣軍躡之，於是武義、永康、縉雲、宣平皆復。己未，溫處道俞樹風等復處州。賊入福建，晏端書遣饒廷選、張

騰蛟率浙兵入閩。周天受遣將赴浦城。七月。曾國藩抵江西。

詔以浙事平。改援福建。八月。國藩至河口鎮。湘軍將張運蘭。蕭啟江。吳國佐。朱品隆。俱來會師。胡興仁奉

命。訶浙事未幾。授浙江巡撫。以皖南各軍糜餉月十萬。議減之。十月。福建賊還走江西。十一月。曾國藩移師援皖。鄧紹良屯甯國。前以灣沚之失。奪官。常怏怏。至是與總兵戴文蘭攻灣沚。黃池。力戰死之。和春令提督鄭魁士駐甯國。繼紹良時。張芾方以三品京堂督皖南軍。令周天受王夢

齡攻婺源。不克。九年正月。鄭魁士復灣沚。黃池。二月。江長貴復婺源。鄭魁士馭軍嚴。其下多怨。當事者劾之。乃稱疾赴東壩。而江長貴。周天受皆隸徽防。號能戰。張芾素倚之。天受事芾謹。且新有功於浙。乃令將甯國兵爲總統。十月。涇縣賊犯甯國。周天受迎擊。失利。副將石玉龍游擊申明照陣歿。十年正月。張國樑克九洑州。金陵賊益危懼。僞忠王李秀成僞侍王李世賢。乃謀擾浙江。以解金陵長圍。連陷涇旌德太平甯國四縣。周天受不能救。二月。戊戌。陷廣德。遂犯浙邊。癸卯。由東亭湖陷安吉。戊申。由泗安陷長興。

杭州戒嚴巡撫羅遵殿新自湖北來徵調蕭翰慶率楚軍
六千往救道遠弗能至

詔和春兼督浙江軍以提督張玉良爲總統率江南軍援
浙時杭州僅李定太軍二千餘赴援泗安吉皆不及遇
賊梅溪敗績退保湖州庚戌賊犯湖州曾秉忠水師至自
江蘇擊走之壬子夜賊從山徑陷武康癸丑夜焚良渚甲
寅黎明薄杭州武林門入十數騎猶未覺候選道陳炳元
率勇巡城知其賊城始閉賊遂分圍武林錢塘湧金清波
諸門城內兵勇三千餘按察使段光清自獨松關回援巡

撫檄甯紹台道仲孫懋入省助守鹽運使繆梓故守衢州
有功仍主堅守段光清主戰丁巳賊登玉皇山段光清繆
梓率兵圍出擊團勇見賊先潰兵亦不戰而還庚申賊於
湖上立營光清親攻之復大敗壬戌清波門地雷發城坍
繆梓死城上巡撫羅遵殿布政使王友端杭嘉湖道葉莖
甯紹台道仲孫懋杭州知府馬昂霄仁和知縣李福謙俱
死之陳炳元巷戰歿在籍侍郎戴熙亦殉節是時滿城猶
未破將軍瑞昌率駐防男婦嚴守三月乙丑朔張玉良以
輕軍六百乘小舟至大關知省城已失丙寅全軍薄杭州

而城外無賊壘。度賊兵少，夜五鼓由艮山門攀堞上，殺守賊十餘人。軍士大呼，天嚮明，賊見張字旗，以爲張國樑至，潰奔出城，遂克杭州。追之萬松嶺，賊走臨安。孝豐長興還，竄廣德。益以新至江北皖南諸寇，勢益張，連陷廣德、東壩、溧陽，遂銳意解金陵圍。閏三月，江南大營陷。四月，蘇常繼陷。張玉良自蘇州還走杭州。庚寅，賊陷嘉興。浙中大恐，巡撫王有齡令玉良收潰卒萬二千圖嘉興。時楚軍將蕭翰慶已至皖南，張芾留攻太平石埭，克之。分所部韋志俊一軍屯皖南，翰慶聞湖州被圍，在籍道員趙景賢守甚力，乃

引兵赴援。至虹星橋，距湖州二十里，賊大至，圍之數重。蕭翰慶力戰死之。部將李楚材突圍達湖州，收集三千餘人，擊賊敗之，賊解圍去。五月，趙景賢率團勇合楚師克平望，進圖嘉興。六月

詔張芾還京，以兩江總督曾國藩兼辦皖南軍。周天受聽調遣，移浙江溫處道。李元度爲安徽甯池太廣道，任徽防。總兵劉季三克餘杭，臨安。七月己酉，張玉良力攻嘉興，破南門，阻水不得入。潮勇通賊謀變。乙卯，大營潰。玉良走石門，丙辰，石門陷。於是嘉善、平湖、桐鄉皆不守。八月癸酉，甯

國陷周天受敗死以李元度攝皖南道丁丑元度至徽州丙戌徽州陷賊由淳安竄嚴州副將封九貴死之九月丁酉嚴州陷分股掠富陽劉季三劉芳貴戰死十月張玉良收嘉興潰卒攻嚴州克之遂克壽昌賊由富陽餘杭分犯杭州瑞昌王有齡城守數日遣文瑞等出擊走之遂收餘杭賊大舉圍湖州趙景賢率民團守四十餘日十一月乙卯景賢出擊大破之湖州解嚴林文察復江山張玉良李定太復常山十一年正月蔣貴斌以民團復富陽二月張威邦會上海軍會秉忠復海鹽米興朝復平湖三月賊乘

官軍退還陷海鹽分犯乍浦守將錫齡阿敗死遂陷平湖是時僞忠王李秀成僞侍王李世賢往來皖南江西左宗棠方以四品京堂襄曾國藩軍事駐景德鎮屢破賊於廣饒間至是復破李世賢於樂平世賢易服遁由婺源竄廣信玉山癸卯陷常山糾三僞王入江山境分黨犯處州世賢自率大股拂嚴州而過乙巳陷龍游徇湯溪以犯金華丁未陷之世賢踞焉浙東大震張玉良屯蘭谿與民團相仇殺因引兵去賊遂陷蘭谿巡撫令處州鎮總兵文瑞圖金華屯孝順街五月參將王浮龍戰歿蘭谿浮龍所部號

浙軍言
奮武軍雖隸張玉良而不擾民間其死皆惜之王有齡增
遣米興朝吳再升率二千人赴金華助文瑞未至而文瑞
兵潰六月戊子朔賊陷義烏旋棄去米興朝等入守之賊
圍文瑞於浦江饒廷選自蘭谿敗歸援之七月楚軍將鮑
超擊李秀成於樟樹大破之秀成由湖坊入浙掠常山合
龍游賊夾攻衢州兩浙益大擾先是浙商胡光墉結好於
李元度請檄募安越軍八千會元度戰湖南江西輾轉數
月而浙事已糜爛新任布政使林福祥由弋陽募勇三千
同知陳大力募湘勇一千知縣張振新募寶勇二千俱集

衢州或說福祥曰新軍乏餉公宜出貲犒軍且收兩軍張
左右翼從龍溪以攻蘭谿而衢防出軍攻湯溪則賊勢分
而下游禍亦紓若但圖與杭兵合同入囊口且兩敗福祥
不能從聽兩軍自行乃赴蘭谿會張玉良饒廷選攻城月
餘不克八月甲子衢州解圍李定太復常山癸酉李世賢
陷嚴州遂由臨浦犯蕭山諸暨陷之紹興戒嚴九月壬寅
賊陷處州總兵特保走石帆自嘉興不守

詔前副都御史王履謙爲團練大臣治軍紹興官紳夙齟
齟民團殺水軍毆知府廖宗元幾斃履謙不能禁九月甲

寅賊犯紹興民團潰城陷廖宗元死之王履謙出走上虞賊躡至陷之履謙浮海入閩當是時浙中郡州惟衢州湖州海甯僅存杭州益孤危巡撫王有齡起丞佐號綜覈初履任則奏止湘軍事亟乃奏調李元度劉培元皆不至復通使祁門乞援曾國藩國藩以軍未集辭湘軍已克安慶威聲震中外而左宗棠新軍戰江皖屢有功有齡復奏請宗棠援浙而以帛書閒關達安慶乞援國藩發其緘僅血書鵠候大援四字國藩深悲憫之繞室達旦不能寐已乃奉

旨命國藩兼制浙江提鎮以下聽太常寺卿左宗棠調遣國藩薦宗棠專浙事奏言近年以來閩粵之賊由撫建北出而入浙皖浙皖之賊由信饒南竄而擾腹地皆以廣信爲必經之路是欲援浙江宜從廣信進兵浙中賊勢浩大非數千人所能救解臣現飭鮑超朱品隆會勦甯國欲以分綴浙中賊勢第恐僞輔王悉眾堅守不能遽拔甯郡之賊卽不能稍解浙江之厄惟左宗棠久駐廣信距賊較近其平日用兵取勢甚遠審幾甚微近日屢與臣書毅然以援浙爲己任應請令左宗棠督率所部進援浙江并將駐

防徽州之臬司張運蘭駐防廣信之道員屈蟠駐防玉山之道員王德榜參將顧雲彩駐防廣信之道員段起各軍及副將孫昌國內河水師均聽左宗棠就近調度兵力較厚運掉較靈

詔左宗棠督浙江軍專奏報且促其行時援浙軍猶踰四萬王有齡復奏請李元度募八千人入浙免論徽州罪且擢爲按察使元度至龍游阻遏不得進而僞忠王李秀成已薄杭州撲武林門踞我營卡布政使林福祥總兵饒廷選引兵還省城十月丁巳賊由慶春門至清泰門楊金榜

要擊敗之西湖賊襲破其營金榜戰死庚申張玉良至自富陽況文榜踵至攻羅木營賊壘破之兵疲甚暫憩具食賊乘夜復成壘遂合圍杭州十門自海潮寺至鳳凰山樹木城以隔援師甲戌張玉良中飛礮死城中益恐糧道旣絕石米值百金居民捐緡錢十餘萬然已無米可買死者盈路草根浮萍蕉葉旣盡乃煮皮籠爲食十一月浙紳胡光墉自甯波運米二萬石泊三廊廟趙炳麟自上海以輪船運米阻颶風皆不能達是時賊糧亦罄李秀成欲回蘇州度歲僞聽王陳炳文持不可守城軍士已數日不食癸

未賊倚梯以登守軍散走城上無阻者杭州遂陷巡撫王有齡自經於署學政張錫庚提督饒廷選總兵文瑞署布政使麟趾按察使甯曾綸鹽運使莊煥文糧道邏福道員胡元博彭斯舉朱琦署仁和知縣吳保豐皆死之越四日滿城亦陷將軍瑞昌縱火自焚副都統傑純巷戰死李秀成以禮斂巡撫學政及總兵文瑞縱林福祥暨巡道劉齊昂送之上海發視之貌皆如生十二月詔左宗棠爲浙江巡撫宗棠佐湖南軍事十年明習戎機及奉

命襄辦親歷行陣所向皆捷又雅善王鑫諸王皆從之杭州之陷也曾國藩上疏自劾奏薦蔣益澧爲浙江布政使因與宗棠議以保徽州固饒廣爲根本而以三府屬縣丁糧供軍設稅局於婺源景德河口以助餉宗棠初膺督師之命卽疏陳方畧謂浙江軍務之壞由歷任督撫全不知兵始則竭本省之餉以濟金陵皖南冀藉其力爲藩蔽而於練兵選將之道漫不經心自金陵皖南敗壞又復廣收潰卒糜以重餉冀其復振卒之兵增餉絀以守則逃以戰則敗遂渙散決裂而不可支今臣奉

命督師非嚴汰冗兵束以營制不可非申明賞罰予以實
餉不可非另行調募預爲換補不可然餉需不繼勢有所
格雖有能將無餉何以馭兵雖有謀臣無兵何以制賊請
飭部臣查明各省協浙之款開單咨臣如藩司撥解遲延
及委員逗留指名參奏

詔允之會僞輔王楊輔清犯徽州宗棠自婺源援之未及
入浙卽授巡撫

詔責宗棠遷延促令赴衢州與李元度規金嚴

同治元年正月曾國藩奏言杭州旣失左宗棠擬由徽郡

進攻嚴州下以扼杭城之吭止以作衢州之蔽然必須攻
克開化遂安等城乃有赴嚴之路必須留守婺源華埠乃
無抄後之虞臣前奏須俟蔣益澧一軍到衢分途進攻非
過於持重故事遷延也實因賊數太多佔地大廣動以長
圍困我若非左宗棠直擣嚴州恐衢州終困長圍之中臣
之愚見必俟左宗棠圍攻嚴州鮑超進抵甯國浙事乃有
下手之處癸卯左宗棠自婺源攻開化破賊馬金街自駐
之遣王開來屯開化城是時諸軍援浙者總督慶端遣將
防龍泉松陽政和別將秦如虎屯温州江蘇軍渡海收定

海甯波仙居民團復台州列縣甯波賊走紹興台州賊走處州温州賊入金華與嚴州賊合窺衢州宗棠慮

朝旨促入衢則自陷奏言衢州城堅易守李定太兵勇八千餘李元度安越軍七千餘加以閩省援師暫可無虞辦賊之法必避長圍防後路先爲自固之計然後可以制賊而不爲賊所制臣若先入衢城墮賊長圍詭謀又成糧盡援絕之勢今由婺入浙先勦開化之賊以清徽郡後路分軍由白沙關進扼華埠以保廣信而固衢城幸三次大捷開化肅清婺源饒廣兩郡相庇以安而楊逆又屢爲徽軍

所創臣軍可無須遠赴徽郡惟浙西皖南一帶山鄉瘠薄產米無多臣軍食米從饒廣採購勞費殊甚臣軍不滿九千徽信防軍雖歸調遣然兩處正在戒嚴未可調以入浙其衢州李定太一軍江山李元度一軍人數與臣相等此次李世賢入犯李定太僅守衢城李元度分扼江常而皆迫切呼援惴惴不能自保臣亦未能責其遠離城池浪戰求勝致損軍威此兵事餉事之難未可遽期速效者也疏入

朝廷以其與曾國藩論畧同嘉允之賊陷青田犯温州秦

如虎拒卻之。二月，民團克遂昌。賊由松陽掠雲和景甯，而黃巖賊掠樂清，青田賊陷瑞州，溫防益危岌。總督慶端移駐浦城。左宗棠自馬金進攻遂安，遣王開來、劉典、劉璈分攻城西楊村。李耀南列隊北崗以疑賊。張聲恆、臬水出賊後，賊棄城走。壬戌，克遂安，留王文瑞、王開來守之。賊由淳安環攻遂安，王文瑞屢擊破之。賊分走嚴州、休甯。李世賢率金華、龍游、大股圍衢州。李定太嬰城守。左宗棠自將往救。次常山之永南，偵賊踞招賢，梗糧運，令劉典、黃少春等分左右進。張聲恆、劉璈應之。戊寅黎明，至招賢，賊不及陣。

棄械奔衢。州糧路始通。而李世賢由大洲竄江山，署布政使。李元度請師，宗棠分兩軍赴之。三月癸未，次大陳。賊先夜遁。乙酉，李元度率十營出戰。碗窰賊自小清湖渡河來犯。元度回擊卻之。丁亥，賊破閩軍營於峽口。宗棠乃移援江山。偵李世賢踞花園港。庚寅，遣劉典會李元度安越軍，攻之不克。宗棠自督軍前進。丁酉，次石笏。世賢方率輕騎至小清湖。宗棠令玉山守將顧雲彩合劉典、黃少春、奈萃、隆等要擊。世賢走免。而花園港石門賊渡水撲安越軍壘。宗棠令朱明亮馳河干堵截。劉典率各營大呼陷陣。賊乃

奔庚子劉典劉璈楊昌濬等分三路攻石門破賊卡數重
進攻花園軍士拔花籬攀壘登賊穴牆發礮我軍死傷三
百餘終弗克甲辰楊昌濬劉典等復三路偪花園火箭燒
賊棚忽大雨傾注賊出壘死拒黃少春受三創乃退師丙
午偽對王洪春元聞花園急自衢州至雙橋眾號數萬宗
棠分軍爲二以其一攻花園其一當援寇戊午賊由上台
毛村繞衢南走龍游宗棠還常山李世賢回竄金華時溫
州民團擊賊羣寇還處州庸集於松陽遂昌閩軍將林文
察攻遂安賊自江山來援林文察破之石練四月甯紹台

道張景渠自定海招海盜商船攻克鎮海會英法兵攻甯
波民團至者過十萬遂克甯波列縣進餘姚偽輔王楊輔
清由威坪犯遂安而甯國賊爲鮑超所敗亦走遂安左宗
棠將攻龍游乃還軍開化令劉典攻華埠馬金扼昏口崔
大光亦至丁卯輔清宵遁王文瑞劉典躡之滄安賊已走
開化入甯國處州樂清賊竄温州秦如虎禦之瞿溪賊由
瞿溪犯郡城溫處道支方廉城守秦如虎自外擊卻之賊
再圍温州閩軍將張啟煊戰桐嶺敗績退守瑞安慶端增
調曾元福曾玉明等赴援民團復縉雲青田樂清五月賊

陷湖州知府瑞春死之自浙江被寇郡縣多淪胥邑紳趙景賢堅守湖州以孤城當劇寇血戰兩載

朝廷惜其才授福建糧道促令之官以脫死且將大用景賢顧遲迴不忍去及城破拘繫之其後賊擁至蘇州李秀成禮敬之甚至景賢益罵賊求死僞慕王譚紹洸不能堪以洋鎗擊之中胸而殞浙人士咸悲悼

詔準巡撫例賜卹甲辰張啟煊蹙賊平陽殲之遂合白瑛秦如虎進攻處州左宗棠進軍衢州擊李世賢於衢州城北大破之東南賊皆棄壘遁總兵劉培元募新軍三千二

百人知府魏喻義募二千人俱集衢州惟蔣益澧軍未至宗棠奏言臣先擬衢州江山兵力足資堵擊當由壽昌淳安直搗嚴州以規省會近探杭州守賊無多賊之大勢趨重金華自應併力先將龍游壽昌蘭溪湯溪等處次第攻勦撤其藩籬犁其巢穴然後分兵嚴處蹙之以取破竹之勢相度形勢似宜先金華而後嚴州今卽進圖龍游壽昌節節搜勦庶於大局有尺寸之補六月宗棠耀兵龍游偵地勢賊伏不動李世賢由嚴州淳安犯遂安宗棠令浙江按察使劉典由嶺路馳援魏喻義扼昏口檄江西將屈蟠

王德榜自常山出華埠截之。己巳，世賢攻遂安急。王文瑞方登陴發巨礮，適江西援師繞僻道至，賊不知多寡，駭而奔。文瑞開城，延援師入，具食再戰。劉典引軍南路合擊，大破之。世賢還走金華。當是時，曾國荃進軍圍金陵，李鴻章擊破浦東廳縣鮑超克甯國廣德，爲國荃聲援。洪秀全大恐，乃飛召李秀成、李世賢合蘇浙賊西援。世賢懼，宗棠偪杭州遣使報秀全，俟擊退衢州軍乃往，而集悍寇入金華。繕城濬濠，嚴守具，以爲出援之地。辛未，林文察克松陽，民團復宣平。七月，秦如虎、林文察復處州。甯國軍復餘姚。宗

棠進軍攻龍游，以劉培元駐圭塘山。王德榜扼全旺，崔大光屯茶圩。宗棠自駐潭石望。戊戌，劉典敗賊東門橋，進攻油埠，敗之。壬寅，楊昌濬禦賊蓮塘，復敗之。乙巳，劉典破裘家堰賊壘五。李耀南、楊昌濬敗賊孟塘，與劉典軍合。賊乃逸。八月，賊犯圭塘山。劉培元、崔大光屢擊走之，追至龍游西南門，仰攻弗克。斃賊三百餘。李世賢聞龍游急，遣驍賊五六萬由永昌湖鎮分三路來攻。龍游賊出城應之。宗棠增遣劉榮、馬德順率親兵馬隊赴援。中路賊方攻劉培元營，援軍從左路抄入。培元空壁出戰，楊昌濬自山下擊，將

士踴躍大呼無不以一當百賊中路先潰王德榜屈蟠從右路夾擊三路援賊皆靡由永昌還走壽昌時李元度坐徽州前事劾免安越軍遣散慶端改將軍耆齡爲閩浙總督史致諤代張景渠爲甯紹台道賊復陷慈谿奉化丁丑上海軍克慈谿閏八月蔣益澧新軍至衢州益澧嘗爲羅澤南偏將初不爲曾胡所知領偏師入廣西連有功名始顯浙事亟宗棠與曾國藩交疏薦之乃增募赴援後卒倚以平浙丙辰宗棠令益澧攻壽昌其部將曰高連陞熊建益各領三千人爲左右軍高連陞出上方嶺熊建益出梅

嶺益澧自領一軍攻其中賊開城迎戰益澧麾軍驅之呼聲振山谷皆愕走追之城邊城賊奪門逃遂克壽昌己巳進攻裘家堰拔其三壘餘壘不戰而潰龍游北路皆靖宗棠乃令益澧全軍渡河徇南路諸壘盡下之僞王宗李世祥詣益澧降宗棠進駐新涼亭距龍游五里築長濠偪之而留蔣益澧攻湯溪劉典屯油埠禦蘭溪金華援寇九月辛亥益澧攻北門高連陞攻東門熊建益劉典攻西門不克慶端遣知府康國器助攻湯溪乃合圍賊酋譚富猶擁眾數萬宗棠令魏喻義移屯淳安壽昌與遂安王文瑞軍

相倚未幾王文瑞移攻績溪魏喻義軍才二千以其半守壽昌進駐銅關去嚴州六十里乃與民團聯克嚴州城北三壘西山團首林三者故與賊相仇因自結於官軍諜報相望王女者江山船船總也主嚴州水絲賊至亦役之苦賊徵求欲引官軍因至銅關求謁喻義具道賊中虛枵狀謂可襲而取也喻義令時時密覘之宗棠慮喻義兵單令移壽昌千人併歸銅關遣劉典攻蘭溪分賊勢蘭溪守賊譚星與嚴州賊譚富兄弟也十一月庚申王女遣報譚富怒林三奪其米舟期明夜襲西山城空可破請具舟濟師

林三亦來乞援辛巳王女率舟數十來迎喻義選千人自將以往午夜薄嚴州城城上不設燎火柝聲斷續軍士勇者梯西門以登殺柝者而代之遂斬關鑰納軍入賊驚覺短兵搏戰頃之潰走其攻西山者亦敗還望城中火光有異探聞官軍已入乃大奔壬午克嚴州甯波軍克上虞台州民團收新昌嵯縣王文瑞克績溪祁門先是李世賢合李秀成圍金陵大營曾國藩檄蔣益澧赴皖南移鮑超軍助曾國荃會國荃擊退援賊乃止益澧北行益澧以湯溪垂克攻愈力偽戴王黃呈忠首王范汝增梯王練業坤自

金華城西酤坊開化村白龍橋連營數十里以援湯溪而
新昌諸暨浦江嵯縣諸賊與蘭溪賊合以援龍游庚午湯
溪賊知援且至出城攻我營熊建益擊敗之蘭溪賊亦渡
河來犯蔣益澧要擊走之次日益澧會劉典軍破譚星於
羅埠壬戌攻酤坊援賊敗之而魏喻義自嚴州潛搗蘭溪
焚賊壘七十餘十二月丁亥劉璈攻賊蘭溪西失利都司
李錦榮等陣歿辛卯蔣益澧劉典擊開化村援賊遊擊彭
承壽陣歿戊戌賊目張成功詣蔣益澧降丁未龍游賊乘
除夕犯東門營劉培元卻之

同治二年正月丙辰湯溪賊彭禹蘭乞降蔣益澧受之誘
其酋李尙陽等出城濠劉樹元徐文秀出不意禽四人彭
禹蘭開西門納官軍戊午克湯溪益澧遣高連陞熊建益
乘勝攻酤坊開化村白龍橋諸壘悉毀之三偽王皆遁己
未金華蘭溪賊亦棄城遁蔣益澧收金華劉典等收蘭溪
王德榜偪龍游城南築三壘賊來攻劉明燈等破之城內
夜譚宗棠知賊將逸密飭諸軍截之賊乘月色啟東門走
湯溪遂復龍游劉培元楊昌濬等躡之湯溪蔣益澧出城
夾擊賊知湯溪已克皆狂走三偽王入諸暨譚星入浦江

庚申林文察復武義永康於是東陽義烏賊皆跳乙丑劉
璈黃少春復浦江宗棠令蔣益澧自義烏劉典自浦江會
攻諸暨民團應之賊惶懼歸誠黃少春受之庚午復諸暨
乙亥甯波軍復紹興丙子魏喻義楊政謨復桐廬新城蕭
山賊皆棄城遁當是時劉典軍追賊至富陽當杭州西南
蔣益澧軍由臨浦義橋蕭山而前當杭州南俱距省城數
十里宗棠策杭城孤危易克慮賊竄江西皖南擾腹地乃
令劉典防徽州固皖南湖南新募勇留廣信扼江西劉培
元赴馬金與王德榜軍合聽進止蔣益澧領萬人攻富陽

以規杭州富陽背山面水西接七里瀧東屬錢塘江自桐
廬之克杭州賊懼悉力拒富陽二月壬午水師將楊政謨
自桐廬下擊燒賊舟數百魏喻義陸師繼之與蔣益澧俱
會富陽水師屯南岸益澧屯新橋據田壠與賊隔水而軍
庚子賊出大隊拒戰熊建益馳馬陷陣賊中伏引退高連
陞躡之被抄頗卻張志公王宗元躍馬入援宗元中鎗死
志公被數創連陞戰良久始收軍王文瑞敗賊祁門劉典
會江西軍復黟縣甯波軍復蕭山三月僞聽王陳炳文率
蘇常賊僞歸王鄧光明率杭嘉賊出臨安攻新城冀襲富

陽官軍後守將魏喻義迎戰不利遂圍新城宗棠發嚴州軍合蔣益澧軍援之四月益澧率高連陞駐新城南熊建益還守新橋賊乘閒攻新橋熊建益擊敗之追薄賊壘中鎗死之楊政謨度賊集新城杭城空虛率水師燒寇舟直搗望江門賊壘平之杭州賊大驚陳炳文等乃撤援富陽諸賊還杭城五月劉典合江西軍敗賊鄱陽

詔移耆齡福州將軍以左宗棠爲閩浙總督曾國荃爲浙江巡撫國荃攻金陵未能至宗棠兼權巡撫時宗棠所部水陸馬步二萬餘人劉典王文瑞以萬人屯皖南蔣益澧

以萬人圖杭州而衢嚴金華諸郡邑留兵設守力益分福建甯波兩軍頗冗雜煩費乃議汰遣節餉六月江蘇軍自松江進攻嘉善嘉興賊北援相持於張涇七月劉典自江西還欵宗棠以富陽久圍不克增調康國器粵勇蔣益澧亦請徵法國總兵德克碑率洋鎗隊會富陽八月庚辰蔣益澧大舉攻富陽辛巳徐文秀渡江奪城北雞籠山新橋賊來爭卻之徐文秀據舊壘背水列營師船護之發炸礮攻城德克碑率花勇自嶺而下楊政謨師船來會自夜達旦礮聲不絕壬午克富陽益澧以劉清亮屯新橋王月亮

屯富陽。自領諸軍薄杭州。偏清波鳳山門而軍。宗棠令康國器、魏喻義攻餘杭。僞康王汪海洋自杭州出援。國器要擊敗之。自倉前長橋縱至武林門北新關。橫至古蕩。賊營延四十里。西達餘杭。益澧屯留下。令高連陞屯六和塔、萬松嶺。據高阜。俯瞰杭城。九月。城賊萬餘由雷峯塔犯新營。高連陞等擊走之。追至饅頭山。壬子。進屯天馬南屏諸山。而魏喻義亦據青山。康國器據寶塔山。以偏餘杭。國器破城南長沙堰卡。遂圍攻南門。喻義敗。賊石門橋。賊復於餘杭東門迤邐至杭州。女兒橋增集悍黨。欲繞何母橋襲餘

杭官軍。後十月。蔣益澧令劉樹元等列隊何母橋。遂於天水護國方家太平諸橋增築四壘以扼賊。嘉興賊大舉援杭州。乘霧潛度萬松嶺。劉志公憑濠拒之。高連陞馳至。洋將德克碑以淺水輪船夾擊。楊政謨率水師登岸攻之。賊大奔。十一月庚戌。江蘇軍復平湖。癸丑。乍浦反正。乙卯。復海鹽。澈浦反正。左宗棠自嚴州移駐富陽。輕騎至餘杭督戰。移富陽。朱明亮等五營。分水。張聲恆四營。助攻餘杭。而以劉明珍率嚴州兩營。淳安四營。屯分水。援皖軍黃少春。自分水出新城。扼餘杭西南。丁卯。蔣益澧、楊昌濬、黃少春

合兵萬三千戰餘杭城西北所殺傷相當其夜賊益濬長濠築三壘以拒軍楊昌濬駐青山蔣益澧還留下庚午江蘇軍復嘉善十二月癸酉朔益澧令高連陞德克碑攻鳳山門自督馬步列錢塘門外秦亭山棲霞嶺以阻寇援連陞等數道並進破賊壘十追之城隍山楊政謨水師亦破江邊石壘甲戌益澧令諸軍分屯錢塘湧金鳳山清波四門據饅頭山雷峯塔秦亭山爲營圍賊中央乙亥楊昌濬等進攻北門賊出拒戰黃少春魏喻義劉明燈等三路乘之賊乃卻劉璈等攻杭城西北隅賊來抄爲朱明亮所敗

城賊始困時雨雪連旬賊堅伏未動丁酉雪霽楊昌濬等攻餘杭破五卡次日攻林清堰堰在餘杭北十里汪海洋老巢也余佩玉等深入後軍隨之不能止昌濬覘賊壘阻水慮日暮爲所乘乃令徐徐收隊賊果伏橫港截我朱明亮劉璈等血戰出險余佩玉中礮死將士傷死三百餘時江蘇大將程學啟攻嘉興急海甯賊蔡元隆大懼乞款蔣益澧請以廖安之知海甯往撫之蔡元隆前踞太倉嘗以詐降陷官軍四百人安之至元隆逡巡未出眾疑之有頃率兵眾來見安之大言曰今大軍且至若等居賊中旦夕

俱死。吾知若等歸降，出至誠，故來受之。如欲用太倉故智者，可斷吾首。元隆惶恐伏地曰：願效死於公。降眾歡呼。己亥，收海甯。易元隆名曰元吉，汰其眾為四千人，隨官軍自效。以劉樹元、張景渠等屯守海甯。

三年正月，蔣益澧遣蔡元吉襲桐鄉，不克。增遣李邦達、合張景渠軍圍攻之。戊申，賊首何培章降。庚戌，收桐鄉。令何培章將降眾三千屯烏鎮，阻杭嘉道，絕賊糧。蔡元吉屯桐鄉。劉樹元進攻嘉興。與江蘇軍合。高連陞、德克碑攻克望江門石壘。三二月，江蘇將程學啟克嘉興，創甚死之。庚寅。

烏鎮賊奔湖州。辛卯，左宗棠督軍攻餘杭，僞裕王中礮死。倉前賊由橫渡橋抄我軍。蔡盛恩、古捷、芳戰歿。林珠、康熊飛內外馳突。賊乃潰，而餘杭賊已暗移輜重婦女於城外。宗棠知賊將逸，令諸軍嚴備以待。先是僞聽王陳炳文遣族兄陳大桂赴蘇州乞款。巡撫李鴻章移書宗棠圖之。炳文忽中變，殺杭城謀內應者。宗棠知賊藉空言緩兵，乃令陳大桂入城，責炳文獻城散眾。久不報。宗棠益促益澧攻城。癸巳黎明，高連陞攻觀音堂，破三壘。陳炳文出萬人來爭。益澧督親兵，合馬德順騎隊馳之。炳文不能支，德克碑

以炸礮擊鳳山門。城坍三丈。丁賢發率壯士及洋兵十餘先登。賊以鎗礮死拒。我軍傷亡百人。高連陞王聯芳俱裹創再進。卒不克。甲午。益澧益獎勵諸軍。陳兵五門。令劉清亮等攻錢塘門。高連陞德克碑等攻鳳山門。王月亮等攻清波門。劉連陞等水師登岸。攻望江清泰門。劉清亮等禦援寇。益澧自率親兵至武林門督戰。別遣徐文秀攻城北長街。文秀銜枚疾走。比近長街。始吹角搖旂。軍士爭拔木椿竹籤。越濠而入。賊伏壘發礮。登者輒蹶。文秀執小旗冒礮躍入內濠。周廷瑞賀國輝繼之。陳炳文率萬人來爭。劉

清亮王東林席得元分路截擊。賊少卻。時長街賊壘垂破。城內復出賊數千。益澧急令洋鎗隊偪城門迎擊。先出者皆斃。餘賊退入城。惟陳炳文猶戰城外。自日中至暮。殺賊數千。我軍亦傷死四百。徐文秀受矛傷。其清泰清波諸門亦以堅壘未克。始各收軍。是夜陳炳文開北門出走。益澧聞城柝漸稀。頃之人聲鼎沸。知賊已逃。卽整部入城。諸軍分門大進。乙未。克杭州。餘杭賊汪海洋亦棄城東走。與杭賊合奔德清。左宗棠奏報兩城同克。

詔獎宗棠太子少保銜。益澧雲騎尉世職。俱賞黃馬褂。提

督高連陞以下給獎有差三月壬寅宗棠移駐省城遣楊昌濬攻武康高連陞攻德清蔡元吉攻石門當承平時杭州城內外居民男女八十一萬口及復城才七八萬口宗棠申虜獲之禁婦女財物各從其主禁軍士無入民居招商開市奏停杭關稅立清賦局減杭嘉湖稅則三之一布政使蔣益澧亦輕財致士杭州善後事一時翕然稱之甲辰楊昌濬復武康乙巳高連陞復德清僞歸王鄧光明以石門降羣賊奔孝豐勢益渙僞聽王陳炳文議守湖州僞佑王李遠繼欲由安吉竄甯國持不決高連陞偵知乘其

亂擊之破賊湖州境賊乃繞千秋關太陽埠走昌化宗棠以賊西犯檄劉清亮守嚴州唐學發等水陸巡桐廬陳炳文汪海洋見官軍逼湖州分道犯徽州嶺內大擾賊前隊已由龍游婺源入江西後至者絡繹於道於是全浙郡縣以次蕩平惟僞堵王黃文金僞佑王李遠繼僞輔王楊輔清堅踞湖州如故宗棠乃令蔣益澧領諸軍規湖州高連陞王月亮蔡元吉由德清進湖州西南劉樹元何培章由石門進湖州東南劉連陞羅啟勇師船攻菱湖四月僞侍王李世賢等由皖南竄江西曾國藩遣鮑超自句容赴援

海軍記 卷十一
詔楊岳斌督皖南江西軍。五月，湖州賊犯長生橋營，蔡元吉屢擊卻之。賊乘虛襲菱湖水軍，高連陞遣洋鎗隊助戰。楊道洽亦至，自餘杭。賊見援軍集，乃奔。蔡元吉攻袁家匯，收降眾七百餘人。劉培元攻太湖塘楊漚賊壘，悉平之。賊走泗安梅溪。楊昌濬由牌頭進桐嶺扼之，令劉璈等攻孝豐。江蘇軍將郭松林克長興。六月癸酉，劉璈克孝豐。楊昌濬北攻安吉。安吉當皖浙交，居萬山中，其險倍孝豐。而梅溪泗安賊與安吉廣德互相連。宗棠貽書李鴻章，請江蘇軍屯泗安。丁亥，楊昌濬自攻安吉，不克。參將朱賢尊中礮

死。乙酉，曾國荃克金陵。賊悉由廣德奔湖州，築壘尹隆橋，通往來。江蘇將郭松林、王永勝等攻橋壘，士多傷。戊子，蘇浙軍合攻晟舍，不利。自辛卯至乙未，蔣益澧頻進戰，賊增壘思溪，與相持。丙申，洋將德克碑攻之，不克。賊圍蔡元吉於東埠。蔣益澧遣軍赴援，阻汊港不能達。德克碑遇賊戰，輒敗退。七月，益澧議先攻荻港。丙午，克其三壘。賊目譚世友等率礮船降。己酉，益澧乘師船出太湖，以花勇屯湖蚌漾。楊政謨泊八角亭。辛亥，政謨會洋將日意格攻袁家匯。益澧率師船夾擊，羣賊爭趨袁家匯。蔡元吉乘閒自東埠

湘軍記 卷十一
潰圍出。所部不及千人。皆飢羸無人色。凡被圍二十餘日。食桑皮。且六七日。感大軍救援。忍死弗敢叛。其伏草閒屍下。賊退而歸伍者。復四百人。是日蘇軍合張景渠克晟舍。於是思溪雙福橋之賊皆遁。先是偽幼主洪福瑱自金陵出走廣德。僞堵王黃文金迎入湖州。及官軍圍攻急。福瑱懼。乃遣其弟僞昭王黃文英偕福瑱還走廣德。是時湖州城賊多歸誠。黃文金復屢挫於蘇軍。甲寅。劉樹元會蘇軍克昇山。蔣益澧益促諸將薄城。江蘇將潘鼎新亦至。城內火起。賊急啟西門。分走廣德。孝豐乙卯。克湖州。丙辰。楊昌

濬克安吉。追賊孝豐。遇湖州敗寇與劉璈等合擊之。降者七八千人。輒解散。餘賊走甯國縣。千秋關。黃文金已至廣德。則挾洪福瑱走甯國縣。出昌化白牛橋。負創死。僞偕王譚體元等出淳安威坪。八月。劉光明追賊至昱嶺。黃少春復自嚴州至威坪。擊賊於蜀口。敗之。賊走遂安。王開琳王德榜自婺源扼開化之華埠。劉明珍由馬金出昏口截之。賊掠開化城。劉明珍誘出敗之。賊遂掠玉山。江山奔江西。洪福瑱隨之。西浙江平。

王定安曰。左文襄未遇時。卽自比諸葛亮。與人緘札。輒署

亮白世多譏其妄監利王柏心獨深許不疑往往見諸詩歌寇初興張亮基居圍城中延爲幕客始贊軍事及駱文忠再撫湖南始大任用兵餉皆倚以決司道衙參白事駱公輒曰往見季高先生籌之駱公畫諾而已當是時萬眾指目謗議橫興訟獄大起

朝廷遣總督按驗簿責甚厲駱公顧委蛇不爲置辨文襄幾危然其名已上聞

文宗召外臣輒垂詢其才比寇事亟曾文正胡文忠交章論薦朝臣亦多言宗棠可大用

文宗超擢京卿不兩載遂躋疆帥開府閩浙攄其所蓄恢恢而敷布之南定百越北靖中夏西暨天山五十餘國皆獸獮而子蓄之已登揆席入樞密安南告警老年出師所謂鞠躬盡瘁死而後已者耶論文襄德量才智吾不知視武侯後先如何要其勛伐過祁山遠矣嗟呼自古賢人君子遭世謗顛蹶沈鬱堙滅抱其所學以終者何可勝數如左公者可不謂厚幸歟

